

Headline	Selangor bantah ECRL guna jajaran asal, lalui kawasan tadahan air		
MediaTitle	Sinar Harian		
Date	17 Jul 2020	Color	Black/white
Section	Nasional	Circulation	140,000
Page No	22	Readership	420,000
Language	Malay	ArticleSize	215 cm ²
Journalist	N/A	AdValue	RM 2,408
Frequency	Daily	PR Value	RM 7,224



Selangor bantah ECRL guna jajaran asal, lalui kawasan tadahan air

SHAH ALAM - Kerajaan Selangor tidak bersetuju dengan cadangan projek Laluan Rel Pantai Timur (ECRL) dibina mengikut jajaran asal yang melalui kawasan Gombak dan Serendah di negeri itu.

Exco Kerajaan Tempatan, Pengangkutan Awam dan Pembangunan Kampung Baru Selangor, Ng Sze Han berkata, ini kerana jajaran asal berkenaan melalui kawasan tadahan air di Selangor.

“Jajaran asal meliputi laluan berhampiran Permatang Kuarza (Gombak), Empangan Batu, Hutan Simpan dan Taman Rimba Templer dan Kota Puteri atau Batu Arang. Jajaran itu melalui kawasan tadahan air.

“Selangor telah mencadangkan lokasi yang lebih strategik iaitu di Jenjarom (Kuala Langat) berhampiran kawasan Rimbayu atau Kampung Cheeding selain di Pelabuhan Barat,” katanya pada Sidang Dewan Undangan Negeri (DUN) Selangor di sini semalam.

Sze Han menjawab pertanyaan **Lau Weng San (PH-Banting)** berhubung status terkini projek ECRL di Selangor.

Pada masa sama, Sze Han menyatakan sekiranya Kementerian Pengangkutan berhasrat meneruskan projek ECRL dengan pelan jajaran asal, impak ekonomi terhadap kawasan di laluan yang pernah dicadangkan sebelum ini harus diselesaikan menerusi solusi yang baik.

Sebelum ini, media melaporkan ada pihak mencadangkan agar laluan ECRL dikembalikan kepada jajaran asal yang diputuskan oleh kerajaan Barisan Nasional sebelum Pilihan Raya Umum ke-14 (PRU14).

Sementara itu, Exco Alam Sekitar, Teknologi Hijau, Sains, Teknologi dan Inovasi (STI) dan Hal Ehwal Pengguna Selangor, Hee Loy Sian berkata, status terkini pewartaan hutan simpan Institut Penyelidikan Perhutanan Malaysia (FRIM) sebagai Tapak Warisan Dunia Pertubuhan Pendidikan, Kebudayaan dan Sainifik Pertubuhan Bangsa-Bangsa Bersatu (Unesco) masih dalam peringkat pencalonan.

Beliau berkata, dokumen berkaitan pencalonan tapak FRIM itu telah dihantar kepada pihak Unesco pada 31 Januari 2017.

“Dokumen ini merupakan senarai menunggu yang perlu dihantar kepada Unesco sekurang-kurangnya setahun sebelum dihantar dossier pencalonan lengkap,” katanya bagi menjawab pertanyaan **Elizabeth Wong Keat Ping (PH-Bukit Lanjan)** berhubung maklum balas terkini pewartaan FRIM sebagai tapak warisan dunia Unesco.

Loy Sian berkata, gerak kerja bagi penyediaan dossier pencalonan serta dokumen berkaitan sedang giat dilaksanakan oleh pakar yang dilantik dan dijangka dihantar kepada Unesco pada tahun 2022. - *Bernamea*